



# Am bat-criogaid



Narinder Dhami • Jamie Smith

# Am bat-criogaid



An teacsá Narinder Dhami  
Na dealbhan Jamie Smith  
A' Ghàidhlig Anna NicDhòmhnaill


STÒRLANN • ACAIR



'S e càraid a bha ann an Seasaidh agus Iain.  
Latha bha siud bha Iain airson geama  
criogaid a chluich ach cha robh caraid aige  
còmhla ris an cluicheadh e.  
Bha Seasaidh còmhla ri a caraidean fhèin  
agus bha Dadaidh aq obair san t-seada.  
“Saoil an cluich Mamaidh còmhla rium?”  
thuirt Iain ris fhèin.


2

Dh'fhàg Iain am bat  
air an talamh agus  
chaidh e a-steach  
dhan taigh.




“An cluich sibh còmhla rium?”  
dh'fhaighnich Iain.  
“Tha mi duilich Iain, tha mi ro thrang,”  
arsa Mamaidh.

3




Thill Iain a-mach ach nuair a chaidh e  
a dh'iarraidh a' bhat cha robh sgeul air.



“Càite bheil am bat-criogaid agam?” ars Iain.  
Choimhead e sa h-uile àite sa ghàrradh ach cha  
robh e ann.




Thòisich Iain a' rànaich.



An uair sin chunnaic Iain clann a' cluich criogaid air an raon-cluiche. Bha e gan coimhead.

Choimhead e a-rithist.

Bha iad a' cluich le bat glè choltach ris a' bhat aige fhèin.



“Sin am bat agamsa,” dh’èigh e.

“Thoiribh air ais dhomh e!”

Bha bat aig nighinn na làimh.

“S e am bat agamsa a th’ ann,” thuirt i.

“Chan e am bat agadsa a th’ ann.”



“S e am bat agamsa a th’ ann,” ars Iain.

“Thàinig thu dhan ghàrradh agamsa agus  
thug thu leat e.”

“Cha tug mi,” ars an nighean.

“Thug m’ athair dhomh am bat seo.”

Bha Iain a’ fàs uabhasach feargach agus  
dh’fheuch e ris a’ bhat a thoirt à làimh na  
h-ìghne.

“Leig às e!” thuirt Iain, ach bha an nighean  
na bu treasa na Iain agus cha b’ urrainn dha  
am bat a thoirt bhuaipe.



Dìreach an uair sin thill Seasaidh dhachaigh.  
“Dè tha thu a’ dèanamh Iain?”  
dh’fhaighnich i.  
“Tha am bat agam aig an nighinn seo agus  
cha toir i air ais dhomh e,” thuirt Iain.  
“Chan e am bat aigesan a th’ ann,”  
ars an nighean.



Thog Seasaidh am bat agus choimhead i ris.  
“Tha mi a’ smaoineachadh gur e bat Iain a  
tha seo,” thuirt i ris an nighinn.  
“Thoir air ais dha e.”  
“Cha toir mi dha e. Chan ann leis a tha e,”  
ars an nighean.



Dh'fheuch an nighean  
ris a' bhat a shlaodadh  
à làimh Seasaidh.  
“Na leig às idir e,  
a Sheasaidh!”  
dh'èigh Iain agus e  
a' dol ga cuideachadh.




An uair sin thàinig a' chlann eile uile a  
chuideachadh na h-ìghne agus dh'fheuch  
iad ris a' bhat-criogaid a thoirt o Sheasaidh  
agus Iain.



Chuala Mamaidh iad agus thàinig i a-mach  
a choimhead dè bha iad a' dèanamh.  
“Cha toir an nighean seo mo bhat dhomh,”  
ars Iain.  
Thog Mamaidh am bat agus choimhead i ris.  
“Tha e coltach ri bat Iain,” thuirt i.  
“Feumaidh tu a thoirt air ais dha.”



Thòisich an nighean a' rànaich.  
 "S e am bat agamsa a th' ann!" thuirt i.  
 Thàinig Dadaidh a-mach às an t-seada.  
 "An e seo a tha thu a lorg?" dh'fhaighnich e.  
 Bha bat-criogaid aige na làimh,  
 glè choltach ris an fhear eile!



"Am bat agamsa!" dh'èigh Iain.  
 "Uill, chunnaic mise e sa ghàrradh,"  
 arsa Dadaidh, "agus chuir mi e dhan t-seada  
 mus fhalbhadh cuideigin leis."  
 Bha Mamaidh agus Seasaidh crosta ri Iain.  
 "Thoir am bat sin dhan nighinn, Iain,"  
 arsa Mamaidh.



Thug Iain am bat air ais dhan nighinn.  
 "Tha mi duilich," thuirt e. "S ann leat  
 a bha e ceart gu leòr."  
 "A bheil thu airson criogaid a chluich  
 còmhla rinn?" dh'fhaighnich an nighean.  
 "Tha, tapadh leat," ars Iain.  
 Bha an nighean agus a caraidean toilichte.  
 "A-nis tha dà bhat againn airson cluich!"  
 thuirt iad.

Poillsichearan Foghlaim Heinemann  
 Halley Court, Jordan Hill, Oxford OX2 8EJ  
 corrann de Foghlam agus Foillseachadh Proifeiseanta Reed Earr.

OXFORD MELBOURNE AUCKLAND  
 JOHANNESBURG BLANTYRE GABORONE  
 IBADAN PORTSMOUTH (NH) USA CHICAGO

© Narinder Dhami 1997

A' chìad fhoillseachadh 1997

A' Ghàidhlig Anna NicDhòmhnaill

Am foillseachadh seo so Ghàidhlig 2003 le Stòrlann Nàiseanta na Gàidhlig/Acair

© na Gàidhlig Stòrlann Nàiseanta na Gàidhlig às leth nan Ùghdarrasan a tha riachdaichte  
 air MRG. Na còraichean uile glèidhete. Chan fhaodar pàirt sam bith dhèan leabhar seo  
 oth-riochdachadh an cruth sam bith no an dòigh sam bith gun chead ro-làimh bho  
 Stòrlann Nàiseanta na Gàidhlig/Acair.

Data Catalogadh ann am Foillseachadh an Leabharlann Bhreatann  
 Gheibhearr clàr-catalogaidh airson an leabhair seo bho Leabharlann Bhreatann

Tha Narinder Dhami a' deasadh còir mhoralta airson a bhith air a comharrachadh  
 mar ùghdar na h-obrach seo.

Clò-bhuailte le Scotprint, Haddington.

LAGE/ISBN 0 86152 632 5